

दिनांक 26.04.2025

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी 51 हजार ऊं बत्ता नौजवानां ने नौकरी लागण रा कागजात संप्या-कह्यो-देश मांय नौजवानां सारु मोकळा मौकां रो बगत ।
- प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम मन की बात मांय काल संवारे 11 बज्यां विचार बतावेला ।
- सूचना अर प्रसारण मंत्रालय मीडिया चैनलां सारु राय जारी कीनी-आतंकवाद रे खिलाफ अभियानां अर हिफाजती दस्तां री हलचल रा सीधा प्रसारण ऊं दूर रहवण बाबत कह्यो ।
- राष्ट्रीय पोषण पखवाड़ा रे दौरान एक करोड़ 17 लाख ऊं बत्ता जागरुकता कार्यक्रमां सागे राजस्थान देश मांय अव्वल ।
- प्रदेश मांय केई ठौड़ां मौसम बदल्यो-अलवर, श्रीगंगानगर, कोटा, बारां अर करौली मांय तेज अंधड़ सागे छांटो छिड़को व्ह्यो ।

प्रधानमंत्री नरेन्द्र मोदी कह्यो है के देश री माली व्यवस्था अर नुवो बुनियादी ढांचो विकसित करण री मोटी ज़िम्मेदारी नौजवानां माथे है। प्रधानमंत्री आज रोजगार मेळा मांय वीडियो कॉन्फ्रेंस रे मार्फत बोल रह्या हा। श्री मोदी कह्यो के स्किल इण्डिया, स्टार्टअप इण्डिया अर डिजिटल इण्डिया सरीखा अभियान नौजवानां सारु नुवा मौका पैदा कर रह्या है। रोजगार मेळा मांय 51 हजार बत्ता नौजवानां ने सरकारी नौकरी लागण रा कागजात दिया ज्या ।

नौकरी-धंधा रा मौको बधावण माथे खास ध्यान देवण री केन्द्र सरकार री सोच रे मुजब 15वों रोजगार मेळो आज देशभर मांय 47 ठौड़ां राख्यी ज्यो। जयपुर मांय ई राख्यी ज्या रोजगार मेळा मांय कृषि राज्यमंत्री भागीरथ चौधरी 433 मोट्यारां ने नियुक्ति पत्र संप्या। ई मौके श्री चौधरी कह्यो के केन्द्र सरकार बत्ता ऊं बत्ता नौजवानां ने नौकरी-धंधा रा मौका देवण री कोशिश कर रही है।

नौजवान नौकरी लागण रा कागजात मिलण परां घणा राजी निजर आया।

कार्यक्रम मांय जयपुर री सांसद मंजू शर्मा ई मौजूद ही।

सूचना अर प्रसारण मंत्रालय मीडिया चैनलां ऊं फौजी टुकड़ियां रा रक्षा ऑपरेशन अर हलचल रा प्रसारण ऊं बचबा री राय दीनी है। देश री हिफाजत ने ध्यान राखता थकां आ राय जारी करी ज्यी है। मंत्रालय मीडिया ऊं रक्षा अभियानां ऊं जुड़ी स्रोत आधारित जाणकारियां रा बारा मांय रिपोर्टिंग करण ऊं दूर रेहवण बाबत् कह्यो है। मंत्रालय रे मुजब टेम ऊं पैली संवेदनशील जाणकारियां रो खुलासो देश विरोधी ताकतां सारु मददगार साबित व्हे सके है अर अभियानां रा असर अर हिफाजती दस्तां री जान खतरा मांय आ सके है। मंत्रालय रे मुजब कारगिल युद्ध, मुंबई आतंकी हमला अर कंधार अपहरण रा वाक्यां रे दौरान संवेदनशील जाणकारियां रो खुलासो देश रा हितां रे खिलाफ साबित व्ह्यो हो।

सरकार हवाई कंपनियां ने हवाई क्षेत्र प्रतिबंधां बीचे मुसाफिरां सारु आसान उपाय लागू करण बाबत् कह्यो है। नागर विमानन मंत्रालय रे मुजब हाल ही मांय कुछ अंतर्राष्ट्रीय हवाई हलका बंद बंद व्हे जावण अर उड़ानां माथे रोक लागण रे कारण केई उड़ानां रा गेला बदल दिया ज्या है, ज्यीं कारण उड़ान रा बगत मांय बधोतरी अर तकनीकी ठहराव री संभावना बध गयी है। मंत्रालय विमान कंपनियां ऊं मुसाफिरां ने इण ऊं जुड़ी जाणकारी हवाई अड्डा मांय जावण री ठौड़ा, बोर्डिंग अर डिजिटल अलर्ट रे मार्फत टेमसर देवण बाबत् कह्यो है।

हनुमानगढ़ जिला रा रावतसर मांय धन्नासर कने अब ऊं थोड़ी देर पैली दो टैंकरां री टक्कर रे कारण तीन जणा री मौत री खबर लागी है। हादसा रे कारण जखमी व्ह्या दो जणां री हालात गंभीर बतायी जा रही है। टक्कर पाछे दोन्यू टैंकरां मांय लाय लाग गयी। पुलिस मौका ऊं गाड़ियां री आवाजाही माथे फिलहाल रोक लगा दीनी है।

राष्ट्रीय पोषण पखवाड़ा रा तैत काम करण रा मामला मांय राजस्थान देश मांय अब्बल रह्यो है। 8 ऊं 22 अप्रैल ताई राख्यी ज्या ई पखवाड़ा रे दौरान प्रदेश मांय रिकॉर्ड प्राप्त करी ज्या। छत्तीसगढ़ दूजी अर महाराष्ट्र तीजी ठौड़ माथे रह्यो। पेश है समाचार कक्ष ऊं सालेहा गाजी री रपट —

लोकसभा अध्यक्ष ओम बिरला आज बूंदी मांय अहलकारां सागे मीटिंग कर र जिला मांय कराया जा रह्या विकास रा कामां रो जायजो लीनो। श्री बिरला जनसुणवाई ई कीनी अर अखिल भारतीय कर्मचारी अधिवेशन मांय ई सिरकत कीनी।

उपमुख्यमंत्री दीया कुमारी दिल्ली मांय राख्यी ज्या भारत इंटरनेशनल टूरिज्म बाजार (ठप्पठ) रा 20वां संस्करण मांय न्यारा-न्यारा देशां रा नुमाइन्दां, पर्यटन विशेषज्ञां अर निवेशकां ने संबोधित कीना। ई मौके वे राजस्थान मांय सैर-सपाटा रा मौकां री दुनिया ने जाणकारी देवण अर इण ने सैर-सपाटा री बेहतरीन ठौड़ बणावण बाबत् राज्य सरकार री नीतियां री जाणकारी दीनी। दीया कुमारी राज्य रा थीम आधारित सर्किट अर पर्यटन री दिशा मांय कर्या जा रह्या नवाचारां री ई जाणकारी दीनी।

राज्य मांय आज पश्चिमी विक्षोभ रा असर ऊं बारां, करौली कोटा, अलवर अर श्रीगंगानगर समेत केई ठौड़ां आंधी सागे छांटो-छिड़को व्ह्यो। राजधानी जयपुर मांय संवारे ऊं ई बादळा मण्ड्या रह्या। दूजी कानी झालावाड़, जैसलमेर अर बाड़मेर समेत न्यारी-न्यारी ठौड़ां जोरदार तावड़ो पड़्यो। मौसम विभाग रे मुजब लारला चौबीस घंटां मांय पिलानी मांय अधिकतम तापमान साढ़े 44 डिग्री सेल्सियस दर्ज करी ज्यो। जयपुर अर बीकानेर संभाग मांय ई कठे-कठे जोरदार गर्मी रही। आज जयपुर अर भरतपुर संभाग मांय कठे-कठे 40 ऊं 50 किलोमीटर प्रतिघंटा री रफ़्तार ऊं बायरो बाजण अर हल्की बरसात व्हेवण रा आसार है। राज्य रा आतूणी हलका मांय आवता पांच दिन ताई लू बाजण अर रात री बगत ई तेज गर्मी रा हालात रेहवण री संभावना है। पाली मांय पड़ रही जोरदार गर्मी बीचे जिला कलेक्टर सरकारी अस्पताल मांय प्याऊ रो उद्घाटन कीनो। ई मौके जरूरतमंद लोगां ने भोजन रा किट अर चप्पलां ई मुहैया करायी ज्यी।

प्रधानमंत्री नरेन्द्र मोदी आकाशवाणी ऊं हर महीना प्रसारित कर्या जावण वाळा खास कार्यक्रम **मन की बात** मांय ई दीतवार 27 अप्रैल ने विचार बतावेला। आ ई कार्यक्रम री 121वीं कड़ी व्हेला। ओ कार्यक्रम आकाशवाणी अर दूरदर्शन रा पूरा नेटवर्क माथे प्रसारित कर्यो जावेला। ई सागे ई मन की बात कार्यक्रम आकाशवाणी समाचार री वेबसाइट अर न्यूज ऑन ए.आई.आर मोबाइल एप, आकाशवाणी समाचार, दूरदर्शन समाचार, प्रधानमंत्री कार्यालय अर सूचना अर प्रसारण मंत्रालय रा यू-ट्यूब चैनलां माथे ई प्रसारित कर्यो जावेला।

कैलाश मानसरोवर यात्रा ई साल जून महीना मांय सरू व्हेला जो अगस्त महीना ताई चालेला। विदेश मंत्रालय रे मुजब जातरूआं रा जत्था उत्तराखंड रा लिपुलेख अर सिक्किम रा नाथूला दर्रा ने पार करता थकां जा सकेला। मंत्रालय री वेबसाइट माथे जातरा सारू अर्जी दी जा सके है। जातरा सारू जावण वाळां रा नाम कम्प्यूटर रे ज़रिये रेंडम तरीका ऊं तैय कर्या जावेला।

इलेक्ट्रॉनिक्स अर आईटी मंत्री अश्विनी वैष्णव आज नई दिल्ली मांय इलेक्ट्रॉनिक्स कंपोनेंट मैनुफैक्चरिंग स्कीम रा दिशा-निर्देश अर ऑनलाइन पोर्टल रो उद्घाटन कीनो। लारला दिनां सरकार इलेक्ट्रॉनिक्स आपूर्ति श्रृंखला मांय देश ने खुद रे पाण ऊबो करण सारू 22 हजार 919 करोड़ रुपया रा निवेश सागे ई योजना ने मंजूरी दीनी ही। एक मई ऊं ऑनलाइन तरीका ऊं ई सारू अर्जी दी जा सकेला। श्री वैष्णव क्ह्यो के लारला 10 साल मांय इलेक्ट्रॉनिक्स विनिर्माण हलका मांय पांच गुना अर इलेक्ट्रॉनिक्स निर्यात मांय छह गुणा री बधोतरी व्ही है।

जोधपुर रा बासनी औद्योगिक हलका मांय एक हैंडीक्राफ्ट फैक्ट्री मांय आज संवारे लाय लाग ग्यी। कने रा दो और कारखाना ई लाय री फेंट मांय आ ग्या। दमकल री केई गाड़ियां मौके पूग र लाय माथे काबू कीनो। लाय लागण रा कारणां री हाल ताई ठा नी पड़ी है।

राष्ट्रीय टी.बी. मुक्त ग्राम पंचायत अभियान रा तैत टी.बी. रा मरीजां ने मुफ़्त दवाइयां अर पोषण किट मुहैया कराया जा रह्या है।

भरतपुर ज़िला रा भुसावर उपखण्ड रा 80 अर नदबई अर सेवर रा 70 मरीज़ां ने पोषण सहायता किट दिया ज्या।

सरकार देश मांय दूध ऊं बणी चीजां री मांग पूरी करण सारू गायां री तादाद बधावण बाबत् कृत्रिम गर्भाधान ने बधावो दे रही है। केन्द्रीय मत्स्य, पशुपालन अर डेयरी राज्य मंत्री सत्यपाल सिंह बघेल आज विश्व पशु चिकित्सा दिवस रे मौके नई दिल्ली मांय राख्यी ज्यी राष्ट्रीय कार्यशाला मांय आ जाणकारी दीनी। वे कह्यो के भारत दूध उत्पादन हलका मांय अव्वल है। विश्व पशु चिकित्सा दिवस हर साल अप्रैल महीना रा आखिरी थावर ने मनायो जावे है।
